

Kviksølvi pillugu Namminersorlutik Oqartussat nalunaarutaat

Avatangiisit innarlitsaaliorneqarnissaanik Inatsisartut inatsisaanni nr. 9-mi, 22. november 2011-meersumi § 10, imm. 1, nr. 1, 2, 7 aamma 20, aamma § 66, imm. 3 naapertorlugit aalajangersarneqarpoq:

Atuuffia

§ 1. Nalunaarummi kviksølvinik tuniniaaneq aniatitsinerlu, kviksølvit ataqatigiiffii aamma tunisassiat kviksølvinik akullit pineqarput.

§ 2. Nalunaarummi kviksølvinik atuinerit, aatsitassaqaqarnermut inatsimmut ilaatinneqartut, taakkununga kuultisiorfeeqqanik ingerlatsinerit aammalu pingaarnertut kviksølvinik piiaanerit ilanngullugit pineqanngillat.

Imm. 2. Nalunaarummi kviksølvinik, kviksølvit ataqatigiiffiinik imaluunniit tunisassianik kviksølvinik akulinnik, avatangiisinut inatsimmi kapitali 7-imi aamma taanna naapertorlugu maleruagassiani malittarisassiuunneqartunik eqqaanerit pineqanngillat.

Taaguutit

§ 3. Nalunaarummi uku imatut paasineqassapput:

- 1) Kviksølvi: Kviksølvi akuitissartaanut tunngaviusoq, saffugassiatut isikkulik aammalu kemiimut tunngasunik ataqatigiiffiusoq.
- 2) Kviksølvi ataqatigiiffii: Akuitissat kviksølvi atom-iinik aamma akuitissat kemiimut tunngasortaanut atom-imik ataatsimik amerlanerusunilluunniit akullit, taamaallaat kemii ikiorsiullugu immikkoortunut assigiinngitsunut immikkoortiterneqarsinnaasut.
- 3) Tunisassiat kviksølvinik akullit: Tunisassiat imaluunniit tunisassiat immikkoortui, ilanngussaq 1-imi allassimasut, nammineerluni kviksølvinik imaluunniit kviksølvi ataqatigiinnerinik akusaasut.
- 4) Amalgami: Amalgami kigutitut ilaartuutissiaq, kviksølvinik imaluunniit kviksølvi ataqatigiiffiinik akulik.

Kviksølvi, kviksølvi ataqatigiiffii aamma tunisassiat kviksølvinik akullit pillugit piumasaqaatit

§ 4. Kviksølvinik, kviksølvi ataqatigiiffiinik aamma tunisassianik kviksølvinik akulinnik eqqussinissaq, avammut nassiussinissaq tuniniaanissarlu inertequtaavoq.

Imm. 2. Tunisassianik kviksølvnik akulinnik sanaartornissaq inerteqqutaavoq.

Imm. 3. Sanaartornerni kviksølvnik imaluunniit kviksølvit ataqtigiinnerinik atuinissaq inerteqqutaavoq.

§ 5. Tunisassiat imaattut kviksølvimik akullit § 4-mi inerteqquteqarnermut ilaatinneqanngillat:

- 1) Tunisassiat inuinnaat illersorneqarnerinut sakkutuunilu atortut pingaarutillit.
- 2) Tunisassiat ilisimatusarnermut, atortut nalimmassarnerinut aamma innersuussivissatut malitassanut atorneqartut.
- 3) Katinnerit innaallagissallu kaaviiarnerani qamittaait, qullit koldkatodelysstofrørit (CCFL) aamma qullit lystrofrørit silatimikkut skærminut elektroniskiusunik elektrodillit (EEFL), kiisalu uuttortaait, kviksølvitaqanngitsunik taarsiisutaasinnaasunik peqanngitsut.
- 4) Kapuutit, aanaveersaatit Thiomersal-inik akullit.

§ 6. Amalgaminik atuneq inerteqqutaavoq.

§ 7. Kviksølvit, kviksølvit ataqtigiinneri imaluunniit tunisassiat kviksølvnik akusat avatangiisinut kuugutsinneqaqqusaanngillat.

Nakkutilliineq

§ 8. Nalunaarummi matumani maleruagassat malinneqarnissaannut kommunalbestyrelsi nakkutilliisussaavoq, aammalu maleruagassat malitsinniarneqarnerini peqqussutinik inerteqqutinillu pisariaqartunik nalunaaruteqartartussaalluni.

Imm. 2. Aamma nakkutilliinermi atuutsitsiniarnermilu avatangiisit innarlitsaaliorneqarnissaannik Inatsisartut inatsisaanni kapitali 12-imi maleruagassat atuutsinneqartussaapput.

Maalaaruteqaatit

§ 9. Nalunaarut manna naapertorlugu aalajangiinernut maalaarutit avatangiisit innarlitsaaliorneqarnissaannik Inatsisartut inatsisaanni kapitali 14-imi maleruagassat naapertorlugit suliarineqassapput.

Pineqaatissiisarnermut aalajangersakkat

§ 10. Akiligassiilluni pineqaatissiissoqarsinnaavoq:

- 1) § 4, imm. 1 unioqqutillugu kviksølvnik, kviksølvit ataqtigiinnerinik imaluunniit tunisassianik kviksølvnik akulinnik eqqussisunut, tuniniaasunut avammulluunniit nassiussisunut.
- 2) § 4, imm. 2 unioqqutillugu tunisassianik sanaartortunut.
- 3) § 4, imm. 3 unioqqutillugu sanaartornermi kviksølvnik imaluunniit kviksølvit ataqtigiinnerinik atuisunut.
- 4) Taartissanik kviksølvitaqanngitsunik peqaraluartoq tunisassianik § 5, imm. 3-mi taaneqartunik atuisunut
- 5) § 6 unioqqutillugu amalgaminik atuisunut.

6) § 7 unioqqutillugu kuugutsitsisunut.

7) § 8, imm. 1 naapertorlugu nakkutilliinermut, peqqussutitut inerteqqutinulluunniit akerliusunut.

Atuuttussanngortitsineq

§ 11. Nalunaarut 7. september 2021-imi atuutilerpoq.

Namminersorlutik Oqartussat, ulloq 6. september 2021

Kalistat Lund

Nunalerinermut, Imminut Pilersornermut, Nukissiutitut Avatangiisinullu Naalakkersuisoq

/ Mette Skarregaard Pedersen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut